



### EDITORIAL

## Ibuksas ngan atuhan an pan-uwat han NTF-ELCAC ha kabaryuhan

Gintikangan na han rehimen Duterte nga igpatuman an Barangay Development Program (BDP) han National Task Force to End Local Communist Armed Conflict (NTF-ELCAC.) Igpapanhatag kuno an "P20 milyon" ha mga barangay nga "nalimpyo" o waray na kuno presensya han BHB agud magtindog han mga kalsada, eskoylahan ngan klinika. Ha paghimo han ilusyon han "kauswagan," tuyo nira nga mahugay an masa nga parag-uma nga diri na suportahan an rebolusyon.

Kundi sosolbaron ba han BDP an kawaray hin tuna han mga parag-uma? An diri makatadungan nga plete ha tuna, usura, ngan panlupot han tuna ngan pandambong ha kalibungan ha ngaran han pagmimina? Diri. Tubtub nga diri nareresolba an monopolyo ha tuna, an gamot han kabido han mga parag-uma ngan hinungdan han ira pakiggerra, diri mahunong an ira armado nga pag-ato. Diri maundang an rebolusyon tungod la ha ira gintindog nga imprastruktura.

Ginduduso an BDP labina han militar tungod kay ginlalawayan hini an milyon-milyon nga pondo ngan makakatinan nira komo *pork barrel*. Sugad han mga daan nga programa nga pagpasu-

render nga PAMANA ngan E-CLIP, kukuhaan la nira ini han kikkak pinaagi han mga proyekto nga imprastruktura.

An BDP usa la ha damo nga buwa han NTF-ELCAC, sugad liwat an mga proyekto nga *livelihood*, mga serbisyo nga pabilib sugad han pagbunot han tango ngan pangarot, ngan panhatag han mga diri man gud kinahanglanon nga *tablet* ngan bisikleta, nga pasangilan la para ha militarisasyon ha mga komunidad. Ha Eastern Visayas, unom la nga barangay an nakapailarum ha BDP kundi ginpapasamwak nira an hiunong ha "20 milyon" bisan ha mga baryo nga diri api hini agud ipasangil an mga operasyon han militar. Nagpapatawag hira han distribusyon han "relief" kundi pasurenderon an mga tumambong.

Inasukaran nga bala an dara han NTF-ELCAC ha mga parag-uma. Diri mahingangalimtan han katawhan an diri maihap nga panmatay, panmomba, pangaresto ngan iba pa nga krimen han rehimen Duterte. Kinahanglan ibuksas ngan atuhan han masa ha kabaryuhan an mga buwa han NTF-ELCAC. Kinahanglan nira ipasulong an gerra han katawhan ngan tapuson an terorismo han militar ha kabaryuhan. ■

## Pan-uwat han AFP-PNP para ha kontra-insurhensiya, padayon

WARAY TUBTUBAN AN pan-uwat han mga alipures han rehimen Duterte ha AFP-PNP para ha kampanya kontra-insurhensiya. Ha Northern Samar, gin-uwat hini an mga residente ha bungto han Catubig nga panhahatagan hira han mga *relief* kundi pagagawason an katitirok komo "peace caravan."

Sigon ha mga report nga nakarawat han BHB-Rodante Urtal Command, ginpatawag nira Lt. Col. Juan Gullem han 20th IB ngan P. BGen. Ronaldo De Jesus han PNP-Region 8 an mga residente han Brgy. Hitapian hadton Enero 13 tungod kay panhahatagan kuno hira han *relief*. Kundi ha mismo nga katitirok, nanawagan hira ha mga mayda kilala nga NPA sumurender na. Ginpanguhaan liwat han ritrato an maabot 300 nga umatendir ngan gin-gawas ha *social media* an katitirok komo "peace caravan" kontra ha PKP-BHB. An Hitapian usa ha unom nga barangay nga gindeklara nga "nalimpyo" na han BHB.

Utro nga nagpatawag han katitirok an AFP-PNP hadton Pebrero 13 ha mga upisyal han barangay, tanod, mga health worker, ngan mga benepisyaryo han 4Ps ha Hitapian, Roxas, San Vicente, Layug ngan San Jose (Hebobollao.) Nagin adyenda an kabahin ha pagbabakuna ngan iligal nga druga kundi nanawagan naman han pasurender an usa

## Demolisyon han mga balay ha Tacloban, igduduso para ha dako nga negosyo

NAGPAHIMATNGON HADIN PEBRERO 19 an lokal nga gubyrno ha Tacloban City nga idedemolis na hini an mga balay nga aada ha pagtitindugan han Tide Embankment Project (TEP), usa nga proyekto nga mapabor ha dagko nga negosyante ngan magpapaiwas ha yukut-yukot nga kablas-ha-syudad ngan parupangisda.

Rason han lokal nga gubyrno, maiha na hira nagpahibaro ha mga residente han mga barangay ha Rawis, Anibong ngan higrani nga komunidad han hihimuon nga demolisyon. Kundi baton han mga residente, mayda hira proyba nga hira an tag-iyang han gin-eestaran nira nga tuna.

Sering nira, ginpapaiwas hira tungod kay ginduduso han gubyrno an TEP, diin titindugon an 27-kilometro nga pader o *seawall* ha kababayunan tikang ha Tacloban ngadto ha Tanauan, Leyte. Ginpapalano nga himuon nga sentro han komersyo ngan negosyo ini nga proyekto nga nabalar hin haros P8 bil-

yon ngan gintatantiya nga makita hin P6.4 bilyon kada tuig.

Ha pag-aram han mga grupo nga AGHAM ngan Center for Environmental Concerns, dako nga destroso ha kalibungan an magigin epekto han TEP. Imbes nga protehiran an mga residente ha *storm surge*, babarahan hini nga pader an mga natural nga aragian han tubig nga magdudurot han pagbaha.

Samtang, ha Tacloban North, nga amo an ginsesering han gubyrno nga poyde na balhinan han mga paiiwason nga residente, problema pa gihapon an kawaray hin tubig, kuryente ngan *substandard* nga istruktura han mga balay. ■

## Mga kabatan-unan, gradweyt han BKP

NAKAHUMAN HAN BATAKAN nga Kurso han Partido (BKP) an maabot 16 nga mga kandidato ngan hul-os nga kaapi han Partido ha usa nga prente gerilya ha Northern Samar hadin Pebrero.

Katorse ha mga gradweyt mga kabatan-unan nga bag-o pa la nga nagpultaym ha BHB ngan mga kaapi han Kabataang Makabayan ha baryo. Duha naman ha nakahaman mga kaapi han Batakan nga Organo han Partido (BOP) ha lokalidad. Nahuman nira an kurso sakob hin usa kasemana ngan ha luyo han presensya han militar ha kahigrani nga baryo.

Nahimo han mga instruktur nga magin marayhak an edukasyon pinaagi han mga mga uyag nga nakabulig ha pagsantop han mga estudyante ha mga topiko han Ekonomiya Pampulitika ngan Imperyalismo. ■

"Panlansi...", tikang ha *paypay 1*

nga pulis nga hi Tenedero. Ginpagawas liwat an mga umatendir komo "surenderi." Ginhimo liwat an "peace caravan" ha mga barangay han Calantiao ha Bobon hadton Pebrero 9 ngan ha Osang ngan Nagooan hadton Pebrero 16.

Ginhihimo han AFP-PNP ini nga modus tungod kay diri hini butaray nga mapatambong an mga residente ha mga aktibidad para ha kontra-insurhensiya. Una na nga nahisumat an pareho nga modus han 63rd IB ha Western Samar hadton Nobyembre 2020.

Samtang, gin-amin naman han kumander han 19th IB nga hi Lt. Col. Jasper Pecson nga mayda mga "sumurender" ha Catbalogan City nga diri ungod nga kaapi han BHB kundi tumambong la ha agud makakuha han mga benepisyo. Ginhimo ni Pecson an pahayag kahuman makwestyon kun ungod nga hadto anay kaapi han BHB an mga ginpasurender ha Matuguinao hadton Pebrero 19. ■



## Bayad-danyos para ha magpapakita han maraot nga *side effects* ha bakuna, ginpapasa han manupakturer ha gubyrno!

Diri an mga kompaniya nga nagmamanupaktura han bakuna kontra COVID-19 kundi an gubyrno an magastos para ha pagpapatambal han mga magkakamayda hin maraot nga reaksyon ha ira bakuna. Amo ini an mahitatabo ha Pilipinas hin **dumiri an kompaniya nga Pfizer nga ideliber an mga dosis han bakuna hini nga bulan tungod kay waray gin-alutaga an gubyrno nga ginsesering nga "indemnification fund"** o pondo para ha bayad-danyos para ha mga iiniksiyunan nga magpapakita hin maraot nga *side effect* (diri ginlalauman nga reaksyon) ha bakuna.

Kahaman ini ipahibaro han Pfizer, dayon nga ginproponer ha Kongreso an HB 8648, para ha "dagmit nga pagparok han bakuna ngan pag-alutaga han ginkikinahanglan nga 'indemnification fund.'"

Dehado hini nga kaayusan an mga nasud sugad han Pilipinas nga diri makahimo han kalugaringon nga bakuna sanglit natapod ha ginmamanupaktura han dagko nga mga kapitalista, bisan pa diri sigurado nga libre ini ha kadelikaduhan. Napipiritan hira nga umabuyon hini nga kontra-katawhan nga rekisitos para la makakuha han bakuna.